

განმარტებითი ბარათი

სსიპ „112“-ის მიერ კომპიუტერული მოწყობილობების და აქსესუარების გამარტივებული ელექტრონული ტენდერის საშუალებით სახელმწიფო შესყიდვის განხორციელების შესახებ საქართველოს მთავრობის განკარგულების პროექტზე

ინფორმაცია სამართლებრივი აქტის პროექტის შესახებ

საქართველოს შინაგან საქმეთა სამინისტროს სსიპ „112“ წარმოადგენს, საქართველოს მასშტაბით, საგანგებო სიტუაციებისა და გადაუდებელი დახმარების აუცილებლობის შესახებ პირველადი შეტყობინებების მიღებაზე უფლებამოსილ უწყებას, რომელიც ამუშავებს მიღებულ ინფორმაციას და რეაგირების მიზნით გადასცემს მას შესაბამის სამსახურებს (პოლიცია, სასწრაფო სამედიცინო დახმარება, სახანძრო-სამაშველო სამსახურები). ზარების მიმღები ალტერნატიული ცენტრის შექმნის მიზნით, სსიპ „112“-მა 2016 წლის 29 დეკემბერს გამოაცხადა ელექტრონული ტენდერი (SPA15 0036164). ამ ეტაპზე ცენტრის მშენებლობა მიმდინარეობს ქ. რუსთავეში და მისი ექსპლუატაციაში გაშვება იგეგმება მიმდინარე წლის სექტემბერში.

ალტერნატიული ცენტრის მშენებლობამ აუცილებელი გახდა ცენტრის ოპერირებისთვის აუცილებელი პროგრამულ-ტექნიკური ბაზის შექმნა და შესაბამისი ინვენტარისა თუ ტექნიკური მოწყობილობების შესყიდვა. ამ მხრივ, განსაკუთრებით მნიშვნელოვანია ე.წ. „ქოლ-ცენტრის“ ფუნქციონირებისთვის აუცილებელი კომპიუტერული ტექნიკის შეძენა, რადგან შეტყობინებების მიღების, დამუშავებისა და გადაცემის პროცესი სრულად არის ინტეგრირებული შესაბამის კომპიუტერულ უზრუნველყოფასთან და მის გარეშე შეუძლებელია ცენტრის სრულფასოვანი ფუნქციონირება.

ყოველივე ზემოაღნიშნულიდან გამომდინარე, საჭირო გახდა სათანადო კომპიუტერული ტექნიკის შეძენა, რომლის სავარაუდო ღირებულება აღემატება 200000.00 ლარს (2016 წლის სახსრებით). კერძოდ, შესყიდულ უნდა იქნას 118 ერთეული ე.წ. „desktop“ კომპიუტერი და 275 ერთეული მონიტორი (მონიტორების დამატებითი რაოდენობის შესყიდვის აუცილებლობა გამოწვეულია სსიპ – „112“-ის ზარის მიმღების სამუშაო სპეციფიკიდან. კერძოდ, აღნიშნულ მოსამსახურეთა მიერ სამუშაო პროცესის შეუფერხებლად განხორციელების მიზნით, ერთ სამუშაო მაგიდაზე აუცილებელია 3 ან 4 მონიტორის განთავსება), 68 ერთეული ვიდეოდაფა და 272 ერთეული ვიდეოდაფის ადაპტერი, ჯამური ღირებულებით – 426745 (ოთხას ოცდაექვსი ათას შვიდას ორმოცდახუთი) ლარი.

აღნიშნული ტექნიკა არის სპეციფიკური და არ არის განკუთვნილი საზოგადოებრივი მოხმარებისთვის, შესაბამისად ბაზრის მოკვლევამ მოითხოვა ხანგძლივი პერიოდი. გარდა ამისა საქართველოს მთავრობის 2016 წლის 9 ივნისის N252 დადგენილებით კომპიუტერული ტექნიკის (CPV - 30213000) შესყიდვისთვის დადგინდა საქართველოს მთავრობასთან წინასწარ შეთანხმების ვალდებულება, შესყიდვის პროცედურების დაწყება შეუძლებელი გახდა საქართველოს მთავრობიდან შესაბამისი თანხმობის მიღებამდე, რამაც კიდევ უფრო გააზანაღრა პროცესი.

აღნიშნულიდან გამომდინარე, ზარების მიმღები ალტერნატიული ცენტრის ექსპლუატაციაში გაშვების თარიღამდე, ვერ იქნება უზრუნველყოფილი შესაბამისი კომპიუტერული ტექნიკის შეძენა, თუკი სსიპ „112“-ის მიერ გამოცხადდება ელექტრონული ტენდერი. ამდენად, „სახელმწიფო შესყიდვების შესახებ“ საქართველოს კანონის 10¹ მუხლის 3¹ პუნქტის შესაბამისად, საჭიროა სსიპ „112“-ს ნება დაერთოს ქ. რუსთავეში მდებარე ზარების მიმღები ალტერნატიული ცენტრისთვის კომპიუტერული მოწყობილობების და აქსესუარების შესყიდვა (CPV 30200000) განხორციელოს გამარტივებული ელექტრონული

ტენდერის პროცედურების მეშვეობით, ნაცვლად ელექტრონული ტენდერის პროცედურებისა.

აუცილებელია სსიპ – „112“-მა შეისყიდოს 118 ერთეული ე.წ. „desktop“ კომპიუტერი და 275 ერთეული მონიტორი (მონიტორების დამატებითი რაოდენობის შესყიდვის აუცილებლობა გამოწვეულია სსიპ – „112“-ის ზარის მიმღების სამუშაო სპეციფიკიდან. კერძოდ, აღნიშნულ მოსამსახურეთა მიერ სამუშაო პროცესის შეუფერხებლად განხორციელების მიზნით, ერთ სამუშაო მაგიდაზე აუცილებელია 3 ან 4 მონიტორის განთავსება), 68 ერთეული ვიდეოდაფა და 272 ერთეული ვიდეოდაფის ადაპტერი, ჯამური ღირებულებით – 426745 (ოთხას ოცდაექვსი ათას შვიდას ორმოცდახუთი) ლარი.

პროექტის მიღებით გამოწვეული საფინანსო-ეკონომიკური შედეგების გაანგარიშება

პროექტის მიღება არ გამოიწვევს ბიუჯეტიდან დამატებითი თანხების გამოყოფას. აღნიშნული პროექტისთვის საჭირო კომპიუტერული მოწყობილობებისა და აქსესუარების სახელმწიფო შესყიდვები განხორციელდება სსიპ „112“-ის მიერ საქართველოს კანონმდებლობით ნებადართული სხვა შემოსავლებით (არასაბიუჯეტო სახსრები).

პროექტის მოსალოდნელი შედეგები

პროექტის მიღებით სსიპ „112“-ის მიერ გამარტივებული ელექტრონული ტენდერის საშუალებით განხორციელდება: კომპიუტერული მოწყობილობებისა და აქსესუარების სახელმწიფო შესყიდვები.

პროექტის განხორციელების ვადა

პროექტის განხორციელება უნდა დასრულდეს 2016 წელს.

პროექტის ავტორი და წარმდგენი

პროექტის ავტორი და წარმდგენია საქართველოს შინაგან საქმეთა სამინისტრო